

# GOBIERNO A CERRA BEATRIX SCHOOL

ORANJESTAD(AAN): Ayera tur mucha di Beatrix School na Playa, a ricibi nan rapport y a cuminsa mes ora cu nan vacacion, un siman prome cu e fecha oficial pa cerramento di schoolnan debi na vacacion largo.

Motibo cu a ser duna pa esaki ta cu Beatrix School ta wordo cerra pa un periodo di mas o

menos 8 luna pa trabaonan di reparacion y renovacion tuma lugar, ya cu condicion fisico di edificio ta den estado deplorable.

Esaki ta significa cu den e aña escolar nobo lo no duna les na e school aki tampoco y segun DIARIO tin entendi lo trata di busca lugar na schoolnan den Oranjestad pa e alumnonan.

Otro opcion ta cu lo busca un of mas edificio cu lo por wordo converti den localidadnan adecuado pa duna les.

Tin opcion tambe pa laga inscribie muchanan na diferente school na San Nicolas, y tambe cooperacion a ser haya di parti di directiva di Fundacion di Schoolnan Catolico cu lo yuda te unda cu por pa acepta alumnonan di e school.

E opcion pa San Nicolas ta e ultimo cu lo por pensa ariba ya cu esaki lo trece cune cu e muchanan lo mester lanta mas tempran mainta pa por alcanza bus di school na ora, y ademas di esey esaki lo significa tambe cu mayornan lo mester busca

nan yiunan ( na Beatrix School den reparacion e tempo ey) mas laat tambe, locual organizatoriamente ta trece hopi dificultad cune.

Segun director interino di e school, den e simannan venidero

lo studia e diferente opcionnan y mayornan lo ser informa di e medida(nan) cu lo ser tuma y tambe cu mayornan lo no mester drenta den panico ya cu tur lo posibel ta ser haci pa soluciona e situacion aki lo mihor posibel.